



Bersama
Prof Dr Taufiq
Yap Yun Hin

Mensyukuri ciptaan agung Ilahi

Kelestarian alam sekitar bermaksud memelihara alam sekitar supaya kekal seperti sediakala. Ia amat berkait rapat dengan tujuan penciptaan manusia sebagai seorang khalifah di atas muka bumi ini.

Firman SWT Allah dalam Surah al-Baqarah, ayat 30 yang bermaksud: "Ingatlah ketika Tuhanmu berfirman kepada para malaikat: Sesungguhnya Aku hendak menjadikan seorang khalifah di muka bumi. Mereka berkata: Mengapa engkau hendak menjadikan (khalifah) di bumi itu orang yang akan membuat kerosakan padanya dan

menumpahkan darah, padahal kami sentiasa bertasbih dengan memuji Engkau dan mensucikan Engkau?"

Lestari bermakna tidak berubah-ubah, kekal dan tetap. Kelestarian pula bermakna semua keperluan untuk kehidupan serta kesejahteraan hidup bergantung secara langsung atau tidak dengan alam ciptaan Tuhan.

Apabila kelestarian dapat dikekalkan, kehidupan manusia dan alam sekitar akan sentiasa dalam keadaan harmoni dan produktif.

Kesejahteraan alam sekitar dan kesihatan manusia sangat berkait rapat dengan tahap kualiti air, udara dan sumber alamnya.



HUTAN paya bakau penting untuk keseimbangan alam sekitar dan kehidupan manusia.

Manusia adalah sebaik-baik makhluk yang diciptakan Allah SWT.

Firman Allah dalam Surah at-Tin, ayat 4 yang bermaksud: "Sesungguhnya Kami menciptakan manusia dalam bentuk yang sebaik-baiknya."

Manusia juga diberikan

pelbagai potensi yang boleh dikembangkan dan direalisasikan melalui proses pengamatan dan pendidikan.

Justeru, memang selayaknya manusia dianugerahkan tugas dan amanah sebagai khalifah Allah di atas muka bumi ini.

Tugas sebagai khalifah meliputi tugas mewujudkan kemakmuran, keselamatan dan kebahagiaan dengan cara beriman dan beramal soleh.

Kerosakan dan pencemaran ke atas sungai, udara dan hutan semuanya berpunca daripada tangan

manusia itu sendiri.

Apabila semakin rakus manusia melakukakan kerosakan, ia bukan hanya memudaratkan kehidupan hari ini tetapi paling ditakuti kemusnahan kehidupan generasi akan datang.

Mustahil bagi generasi hadapan mengecapi udara atau air bersih sekiranya kerosakan terus berlaku tanpa proses pemeliharaan.

Tugas pemeliharaan pastinya akan semakin sukar sekiranya tahap kerosakan terlalu teruk, akhirnya membabitkan nilai kos yang begitu tinggi selain turut mengancam nyawa.

Menjadi kewajipan setiap manusia beriman untuk memelihara alam sekitar sebagai tanda ke taatan dan kesyukuran kepada Allah SWT.

Penulis ialah Presiden Persatuan Cina Muslim Malaysia (MACMA) dan profesor di Universiti Putra Malaysia